

錄廳舊碑毀于壬亂其後廟貌復新而興廢無徵以卞季良所撰舊文刻之李廷龜記陰○五月葬連珠府夫人禮曹奏發引時自上當於闕門內哭送政院又奏陪往山陵雖載於五禮儀而祖宗朝未嘗行之只當辭於闕門內上曰哭辭中門其可忍諸子意已決不須煩瀆上命儒臣攷漢悼園故事稱墓爲毓慶園大諫張維上劄曰事親終始一有違禮非聖人所謂孝也一字之稱無益於顯親之實請寢稱園不允○結城海邊有古石碑忽有七大石自海中出至碑下○六月禮曹奏文廟祀典與大明會典不類申棖申黨一人而複享顏何秦冉本無其人且大成至聖文宣王之號先儒多論其未安中朝稱爲至聖先師其號甚正其尊無比此當并依中朝定制然其陞黜亦不無可議陸九淵王守仁陳獻章流爲異端不可躋享且七十子舊稱先賢周程張朱并稱先儒夫周程張朱功不在孟子下只以年代之晚在兩廡之末誠爲欠典今稱先賢升享殿上可也從之尋因申欽劄遂寢○初啓運宮喪上哀痛食素每親臨魂宮行祭園墓輒哀傷不豫至是慈殿及群臣咸請從權節哀上曰予早喪嚴親只恃偏母榮養未久慈堂遽空惟予心事曷有其極得有一國之奉而父母俱不在

焉東望西顧痛哭而已今也園土未乾身又無疾古人所慮滅性云者豈指如予者而言哉人子之執喪當以禮制人臣之事君亦當以禮義寡昧誠孝淺薄致有今日之紛紜實深慚覲群臣連請皆不從○吳允謙奏宗廟樂章紊亂失次李植亦以爲言命禮曹議定復議諸大臣尹昉申欽以爲宣廟有中興之烈宜別撰樂章其餘仍舊不改從之時春秋堂上未詳於世宗雅樂變爲世祖俗樂又未知雅樂只迎神九成俗樂通迎神三獻皆各九成故不得已別撰添補○大諫李植請禁諸宮家私自封殖及勒占民田從之○秋七月妖熒見坤方○八月遣金尙憲赴明時蝦島將毛文龍飛語構陷本國本國將遣使辨明而水路危險人皆畏避三易望而歸尙憲遂與副使南以雄航海至北京○南漢山本百濟舊都在京東四十里迺變後李元翼李貴建請築城命摠戎使李曙掌其事至是竣功以田二千餘結屬之移邑治而鎮之○設守禦廳○金主奴兒哈赤殂子弘他時立是爲清太宗○禁以子證父以弟證兄以奴證主著爲令○自國初設賑恤廳後屬備局至是屬宣惠廳○晉州儒生河德寬上疏陳弊一請囑大行官方紊亂二政委銓長公道不恢三賦法不行貪吏自恣四科

第不明奔競成風五聽言之道漸不如初一忤上旨人自物色及見政目果若人言且言太白經天虎入後苑變亂之徵有不可掩而曾無一人陳此弊源越俎之言勢所不已上賜小學以嘉獎之○憲府言坡平君尹鞏附會凶逆投疏殺永昌大君反正之後得保官爵禮判任就正參議睦長欽吳煥韓惟翔等互相締結附會凶論尙今在職請鞏削職就正等遞職從之○益山人蘇行李寶壬辰亂召募義旅歃血同盟從高敬命趙憲于錦山斬首數百級力戰死之至是監司閔聖徽奏請旌褒許之○冬十月以尹昉爲領議政申欽爲左議政吳允謙爲右議政○雷○以金德誠爲大司成館舊有學田自壬辰後皆爲館奴所盜占德誠一一覈出土子之陳廢母疏者復齒士類德誠欲糾其解罰者由是館奴怨之士心亦多不悅德誠上疏以爲如此則淑慝無辨士習壞裂首善之地徒爲爭奪之場上優答定配館奴二人館儒陳疏謝罪上遣承旨宣諭勉以遵教誨修學業仍宣醢以大卮飲諸生爲罰諸生皆稱謝○十二月減京畿大同米之半以荐經明使及毓慶園遷厝之役也○昌城雨雹狀如人面鼻口皆具

132
213

草魚身卷之八

金源中奇贈

132
213

